



清刻龍藏佛說法變相圖

新編 乾隆大藏經

二

龍藏

十住斷結經卷第一

談一

姚秦沙門竺佛念譯

導引品第

聞如是一時佛在毗舍離城椽氏樹園與大
 比立衆八萬四千菩薩十萬四千人俱普皆
 大聖玄鑑通達獲致摠持辯無滯礙三昧常
 定慧無畏難解了纏縛十二行本以逮深要
 不起法忍周流五趣觀察訓導以佛弘智覆
 蓋衆生隨其根源而救濟之執持威儀不失
 禮節其名曰常淨菩薩寶積菩薩寶士菩薩
 寶印首菩薩寶藏菩薩趣意菩薩轉法輪菩
 薩除陰蓋菩薩施蓮華行菩薩師子菩薩日
 光菩薩見正反邪菩薩不置遠菩薩無損志
 菩薩持地菩薩持魔菩薩造化菩薩水光菩
 薩施相菩薩應聲菩薩金纓菩薩慈氏菩薩

濡首等十萬四千人俱爾時地主四大天王
釋提桓因將諸忉利天焰天兜術天化自在
天他化自在天第一梵天王將諸梵眾來詣
佛所及諸天龍鬼神捷沓愁阿須倫迦留羅
眞陀羅摩休勒人與非人悉來集會爾時如
來與無央數億千之眾眷屬圍遶而爲說法
弊魔波旬不安本位復將官屬前後圍遶來
至佛所頭面稽首在一面立此賢劫中一切
大聖諸正士等皆悉雲集是時如來復以舌
相光明普照三千大千刹土見光明者各相
謂言今日忍土釋迦文佛放大光明引致十
方高行菩薩於光明中演出此音能仁如來
至眞等正覺在娑訶國土放微妙光與諸大
人演說十千三昧正定非是緣覺聲聞所行
我等各各齋供養具詣彼忍土興致禮敬承

受奉觀於時東方去此九萬二千諸佛世界
國名盛妙佛號殊勝如來其佛左右有菩薩
名曰執志通慧大士住不退轉光明遍彼勸
進菩薩尋自往詣盛妙如來至眞等正覺所
稽首長跪而白佛言唯然大聖欲至忍土奉
觀釋迦文佛至眞等正覺稽首問訊諮受未
聞其佛告曰宜知是時便往勿疑又謂執志
雖至忍界即當奉行五十五事戢在心懷無
令漏失何謂五十五事施與不施等於戒犯
戒等忍對不起等進退彊意等亂心禪定等
深智淺愚等怨讎二親等見罵若空等三乘
無高下亦無若干想亦不見善亦不見不善
亦不見佛土淨亦不見佛土不淨若見眾生
生惡趣者不懷恐畏見諸上士觀如眾祐亦
不有二常若一心若見有殺盜淫泆妄言綺

語嗜酒愚亂嫉妬恚癡鬪訟彼此心執邪見
非常言常悉當平等無增減心莫見戒具受
上福報施受大福亦復莫云我今護殺延壽
無量亦莫相輕我相好勝教戒殊特彼人卑
穢凡大朋黨除去七慢十二無記是爲五十
五事當念修行佛言執志若有族姓子族姓
女心志質直等住定意可遊彼土設百千劫
於吾之土建立梵行不如忍界彈指之間無
高下意是爲殊勝億千萬倍於時彼土五萬
菩薩各誓願言我當具足心意清淨侍衛執
志菩薩得詣奉觀能仁如來至真等正覺執
志菩薩即與五萬菩薩譬如力士屈伸臂頃
斯須之間於其佛土忽然不現尋在忍界奉
觀能仁稽首禮拜退住一面爾時世尊觀衆
來會集坐已定告四部衆汝等見此執志菩

薩乎對曰已見佛言諸族姓子斯大士者超
越三有分別深奧辯才通達慈哀感動神足
變化導引勸進所遊居處多所饒益是時座
上有菩薩名曰最勝承佛威神即從座起頭
面禮足白世尊曰唯然無著志性愚癡願欲
所問若見聽許乃敢陳啓佛告最勝恣汝所
問如來當爲解說爾時最勝菩薩以聽所啓
即白佛言唯然世尊如來至真入何三昧放
大光明踰於日月若有衆生觀如來光必至
所願不失人根此何變化神妙乃爾佛告最
勝快哉問矣誠如來言光明威力接度衆生
多所開化如來隨宜入億百千諸三昧定遊
於恒沙無量佛土塵數劫兆性行所趣有姪
怒癡強梁自用貢高放佚者如來觀察具分
別之爾時最勝復白佛言何謂菩薩從初發

迹至成作佛一地二地至乎十地爲斷幾結
消除幾垢何謂菩薩解了己身內外無生何
謂菩薩自稱廣施不除斷滅何謂菩薩行戒
具足終而不犯亦不毀戒墜墮本位何謂菩
薩忍而不起於忍退還爲凡夫行何謂菩薩
精勤不懈復有慢怠從始積業何謂菩薩入
定意法天雷震動心不錯亂云何菩薩初發
心行無能斷者云何菩薩意識安隱不可捨
離何謂菩薩其心獨尊與衆超異云何菩薩
心之所趣無能知意爾時世尊告最勝曰善
哉善哉乃問斯義多所饒益多所成辦今當
爲汝敷演其義菩薩所行不可思議智無邊
崖亦無等侶乃能興心於如來前而師子吼
諦聽諦聽善思念之最勝對曰受教而聽佛
言菩薩發心求無上道先斷妄見身邪戒盜

分別苦智建立志願具足禁戒每自思惟我
之所行願樂遠離凡俗之法以五陰性不可
得故道亦不可得況於在道外者倚色痛想
行識求度衆生佛復告最勝五陰亦無觀行
衆生亦無觀行亦復不見所可度者無言教
法非羅漢辟支佛所能及也爾時最勝菩薩
白佛言世尊不從五陰無觀行得道不從衆
生無觀行得道寧可從四禁法得乎佛言非
也最勝復白佛言設不從四事得者復可從
空得耶佛言非也爾時最勝菩薩復白佛言
不從空得不從四事得者今日如來及衆會
者不成無上道亦不得果報乎佛言成無上
道耳但不住有性亦不住無性而成等正覺
最勝白佛言云何色痛想行識及內外法善
惡法有漏無漏法有爲無爲法如來所說名

號之法云何以名想字體教授一切乎佛言
行亦無名復無想念不見入出之二來往周
旋故號一切智菩薩常常以十法了十地事
云何十法了十地事以苦集義盡道之義滅
盡無生一切遍義自識己身及他人義於六
邪本及六十二見皆知空無義菩薩行是時
當除有跡無跡云何除有跡無跡道是迹非
道無迹來往是迹無來往者便無有迹菩薩
當念修諸住地當行苦義斷婬欲之火瞋恚
之毒愚癡之刺悲慈之心遍滿四方雖有愍
哀意亦不有想己所惠施終不為己普及衆
生亦無所悋施不見施不有受者及與財物
念與善者周接常常下意無生貢高說法之
時不見有法出生巢窟無法之想出家之日
與愛欲別以空無法斷除顧戀求佛成道莫

著相好亦復莫念吾先成道某在吾後設欲
分流法教終不敗法毀法進趣果證不為塵
欲所牽心常懷念滅於貢高自用不求法報
及財寶物所授諦說無言教想持身如空空
無想念是為菩薩以苦智誠辦淨一地迹復
次菩薩復以苦義集義行百千定若欲得佛
心定意三昧者不以色想亦不以種好亦復
不以本宿行故而致一住亦不希望作是致
是不作是亦不獲是常建是志不念過去當
來之著亦復不念今現在世生死所趣不從
五陰六衰而剋此法亦不離五陰六衰復當
思惟六無根本六無根本者眼耳鼻口身意
從所起生從所起滅復當分別六衰所興了
知尋察色聲香味細滑之法亦復不用見聞
念知心意識法得淨一住不以巧偽生滅之

法有常之想淨於一地無正無邪不造等意六
無所希望亦不是是亦不非非而淨住地亦
不從一二三四至百千定亦復不離百千定
意而淨住地不因心意而曉內外衆念望想
是非之事亦不色痛想行識而淨其地亦不
用戒聞定意慧解度知見十力無所護四無
所畏諸佛所寶十八法本不可以意想知見
我想無我想不以五陰六衰生滅之處亦無
所住亦無不住是謂菩薩淨一住地亦無色
痛想行識之屋室亦不眼色耳聲鼻香舌味
身細滑之處所何以故不可目視而見衆相
解不起不滅之法無終無始是謂菩薩於初
地中而淨其跡悉具足成道慧備滿如來所
宣無有差別若干之念便能解暢亦能爲人
啓受諷誦普能周悉諸佛深藏佛復告最勝

菩薩復當具足六度無極念捨形色無所希
望不生三念染著之法是則名曰施度無極
欲知根原不念佛身達了本無當知以佛戒
度無極不自想念我得成就三十二相計校
諸法假號名句相貌無盡住不起法是故名
之忍度無極一切諸法普無觀行亦無聞見七
行道士法見善不悅逢惡不感意無適莫是
故名曰進度無極心不興念起於亂想寂怕
自守意識永定是故名曰禪度無極解色相
空敗毀色空亦不自高不懷自大諸法之相
達知爲一亦非有一是故名曰智度無極復
以權道應適衆生隨緣拔濟使不漏失是故
最勝發意菩薩以苦聖智治初地行便能具
足諸三昧門陀隣尼門智慧自在復次菩薩
得是十千三昧住於欲界當以苦智等智果

報分別十法欲恚慢癡狐疑身見邪見內見
戒見盜見法已知已了不除不盡亦不令生
復以苦智等智於有形無形曉了十八結母
雖分別結不盡不賜最勝當知初學發意復
以集義等義於三昧定住於欲界形無形界
思惟十九怨對之灾瘡癘之患滲漏無首盡
滅等義復於三界觀察十九迷誤之法道在
三處有二十二亦當思惟三十四無漏聖意
具諸功德悉為成辦觀于無常苦空非身解
知無二乃於一地而淨其跡也

留化品第二

爾時最勝菩薩前白佛言云何菩薩於二住
地而具足行必果所願無有中錯佛告最勝
菩薩於二地中常當思惟念淨其戒識其重
恩勤行忍辱謙恭卑下常懷喜悅先笑後言

行大慈悲孝順師長篤信三寶崇習妙慧無
生染著計有常存夫計常者謂生死業解有
道常常道非尊尊出非常乃謂為尊尊既無
尊何言道尊是故最勝菩薩了道亦無尊卑
亦無相像虛空猶常言有形質真道號字不
可覩見其心坦然無所縛著所修德業不離
諸佛無能中道而得斷絕一切諸惡悉盡無
餘其心永定不可動轉志如金剛亦無伴侶
皆知一切諸法之本以除眾垢消滅闇冥其
法晃曜靡不照明心懷質直亦無諛諂性行
平等無彼此意發心以來常懷鮮潔由本淨
故得去諸垢沐浴清淵蕩除眾穢其信堅固
無所遺捨施意廣大無有邊涯心若虛空亦
無窮盡舍受下劣將養使度所以然者其慧
純淑無所罣礙心之所規無所不容大慈無

窮不盡之藏得識辯才常懷羞恥堅固之行
心不可沮覺道之力無所不入辯才過衆無
不渴仰得諸總持亦不忘失初不演說不急
之事於百千定終不狐疑聞善惡法不懷憂
喜不自貢高復不自下進趣安詳不失威儀
十二行本曉知五陰六衰所起復以苦集盡
道分別十二緣起癡行生死靡不貫達觀察
五根具滿思念不復往來生死穢著乃以八
十四智消滅諸漏誓留化身一劫教授如我
今身必當入於無餘泥洹不永滅度亦復留
化在賢明土將無數衆前後圍遶說微妙法
最勝當知賢明去此北方度十三億恒河沙
等諸佛刹土彼有世界名不動轉有佛號照
意如來至真等正覺現在說法不動轉界亦
無聲聞緣覺之名純諸登位大乘行人布施

戒忍精進禪定以神通慧而自娛樂無極之
智纏絡其身隨時分別章句深妙慈悲喜護
等如虛空觀前衆生知其志性爲雨甘露無
極法味其服食者無瞋恨結行三昧空無
相願拔濟生死立無爲岸降魔塵勞懷害之
毒彼佛神足感動變化周旋徃反無量佛土
彼受訓者不知是化謂爲真佛過去恒沙諸
佛世尊皆留化佛接緣衆生使獲無爲是故
如來隱形適化不可思議方將來佛慈氏等
輩亦各有化如來之像開導衆生我雖滅度
彼化佛身亦不滅度是故最勝化亦無化佛
亦無佛解知空寂亦不二三若干之相二地
菩薩常當修習幻化之法觀了慧地誠信之
地見地薄地終成之地緣覺聲聞所居之地
雖療其疾不取其證假使最勝二住菩薩欲

取聲聞緣覺證者甚無有難譬如有人手執華鬘及明月珠仰擲虛空未墮地頃於其中間斷結除垢諸漏永滅無生老死憂患之苦但爲菩薩雖知斷結終不取證所以然者未察衆生上中下意堅固其心永處究竟與無蓋雲擊慧雷聲降甘露藥宣真諦寶不斷三業意念鮮潔如水清徹恒用禁戒而自莊嚴復以衆德修飾形相奉遵上妙賢聖覺道至後胎分一生補處學現諸佛所造本業覺意總持悉無處所先念興意嚴淨道場隨時進止行安般念在衆強志御無所畏心便勇健而得自在發心願成甚可愛敬爲諸衆生說喜樂法其心特尊與衆超異若能執持空無之相外道竒術無奈之何聲聞緣覺常所宗敬是時世尊復告最勝二地菩薩達知本無

遠離身行去口殃禍除意亂念消滅三穢抑制三灾掩塞五蔽推尋十二癡行之本上下五結散在三界以漸除却無令增多思惟十一苦惱之瘡捨諸四大耽著之病分別諸物惡露之法當避家業息諸習俗斷其愛欲瞋恚貪垢淨刈根本不使流馳常念思惟計無我想堅立四信住四意止成四意斷稱說五根布現五力無缺滅志曉知七覺諸寶之藏修行八正賢聖之道入大人念初不廢捨如是最勝二地菩薩執心調意不若干念解知悉空而無真實乃得上位受菩薩記不動勞行亦不離行學於上智雖有尊貴意不貢高觀知諸法一法不二不計三想亦復不與無益之想不有限際有無之想了想無處不住無處惟正覺淨諸佛亦淨善御於心正住不

邪等一善惡審知俱空空不疑礙亦復不見註
有爭無爭有觀無觀本無爲一亦不見一知
一除一不住於一復不從一而起衆想等習
勝意無習有際不見有際有勝有負不聽心
散越內外法善防禦識定而不轉雖在三有
不著於三深察諸性了知無根知無根者所
謂淨地二住菩薩自整其心觀諸法本悉同
無常常無所入不見出生無善不善好惡之
名利衰毀譽稱譏苦樂調正心意無有憂感
在所入處開示大藏入大法海念求七慧煎
熬三愛善制四流修六重法成果證行如是最
勝菩薩大士具諸法已知無形貌而不可見
是謂習學淨於二地
空觀品第三
爾時最勝菩薩復白佛言云何菩薩於三地

中當淨其行世尊告曰進學菩薩無出入念
雖多學問義無厭足不入文句字體本末分
流法施謙下於人修治國土無國土想建立
善業亦不貢高初發心行無令有斷成功德
願志如安明觀諸衆生說喜樂法從初發意
以爲道本由是得至永寂道果心念廣施遍
及一切建立志願具足禁戒開意精進行無
懈怠無所喜樂唯道爲務無歸趣者與作將
導因爲分別大智之法從初立心永無所住
用極大慈不可見故欲拔根源立大乘迹當
行悲哀愍其未度設見度者當懷悅豫於諸
衆生平等其心雖遇苦樂亦不爲動將護一
切引入道門爲諸如來所見殊特念順十方
諸佛教戒當度一切五趣之難興隆道化無
損三寶無所違失便成道果將順禁戒爲衆

入則暢演智慧無窮之寶猶如虛空不可窮盡其一切智亦不可盡如來心識亦復如是無有生滅著斷之二定意三昧智慧解脫度知見身無有近遠亦不可見最勝當知一切諸佛深法之要亦不可盡亦無端緒去來現在三世合散亦無所有不見有集有所成辦復無散落變易非一四大所造地水火風亦無有對而不可見用智了別衆生心行本願不斷不可思議皆無所生亦無髣髴一切諸法尋不可知以是之故故無所生亦復無法可有生者生已無生何者是生是故最勝發菩薩心而無窮盡不設心意形相諸法復無諛諂僥望諸法其心質直在衆殊特修息心法自觀身法觀他人身皆悉空寂不生想念觀身無染而不可得亦無受者分別爲一行

步進止探察三界受形之類皆由癡愛遭諸苦惱了知無二而不可見痛意行法內外虛空無有生滅復次最勝進學菩薩觀息出入長短遲疾身中毛孔氣息所經靡不了達出氣爲溫還報爲冷解知寂寞都無形質菩薩觀身分別識知亦無處所用清淨故平正無邪柔軟其心不懷羸獷篤信真要未曾變改志常堅強而無動轉無能憎嫉而傷害者何以故爾以其行際不可逮及有所建立無能誹謗何敢興造無根無罪心垢爲消願令法輪常轉於世使一切人疾得妙慧光照幽冥如日貫雲立道善本自觀無我生無處所於內外法俱亦如是亦復不見生死所趣起滅之處乃至羅漢緣覺及佛皆無見聞有想見者爲非見也無所想見一切清淨不止淨想

乃爲非想是爲空見爲無所見復次最勝心不在內亦不處外不於道法不住於俗亦不住有亦不住無不見起滅動搖之處心無涯畔廣普無底亦無音響本末悉盡如是最勝當作是觀觀無所觀當作是見見無所見習行菩薩爲空爲滅爲無所有三住菩薩以諸法定使意專精計念成淨作是計者爲應泥洹應無所生是法無法無亦無無強爲生名字爲法性曉了法性無來往緣習斷意法哀世現名惡法未生精進御止攝使不起已與惡者御意令斷未生善法精勤使生已生增多不使漏失三住菩薩行神足定得樂喜定止所作行總其神足持身心意以精勤定除所作惡復總神足攝持身心復以意定除其所作統攝神足持於身心以智慧定除諸所

作統其神足亦持身心漸進修根信精進根意定慧根便得入要佛法空盡無彼無我亦無因緣復無纏縛貪有計常生死苦斷一切無跡人多相倚見著姓名於無數世當復積行憂惱相隨如影隨形往來不停如輪在轍莫知端緒行定無倚正觀不著貪^{十四}盡想滅結解清淨於行不惑意無憂惱生老病斷無復往來慧眼大明普照世人拔十二緣無點慧惑復次最勝菩薩大士復當修行神力之德夫神力者莫能沮壞天魔外道威力之神無侵暴者信力精進意定慧力是謂菩薩每修行者遂應漸進七覺意華以意覺華行十五心斷慳恪心履菩薩迹成深妙慧而不退轉法覺意華無爲無作除去穢惡不善之行精進覺華合受懈慢有放逸者抑使不起歡悅

覺華應三禪地攝諸亂想寂怕無爲猗覺意
華無所貪著觀了諸法亦無所習以信覺華
其志牢固暢說微妙而無悔恨亦當思惟無
著覺華斷百八瑕染著心者復當修習八賢
聖道等念等定等語等行等業等習等意等
定超過八難越度六衰亦復分別三三昧法
具此行已乃得稱爲淨三住地如是最勝菩
薩大士習行慧門校計空無不可得觀無有
形相相亦無相與人說法恒用中正所言至
誠終無有異設有與無所希望不求名稱
爲人所歎咸共戴奉興致供養有所造作不
自爲已先求彼安後乃恤已所以自致獲安
隱者所施功德不懷懈倦有所施爲苦無厭
足用愍一切衆生故也用無極慈拔濟老死
爲懈倦者而興精進所以勇猛興精進者欲

以養育衆生之類常當自念我由衆生得辦
道果諸功德業亦復具足所可陳力不希望
報所以然者以心淨故蒙法潤澤是故無求
世人有所求爲除利求以是慧力護一切法願
令羣黎各寧其所使上中下悉無怨恨所作
事業安隱審諦由是菩薩無能制者亦復無
能抑斷之者如是最勝菩薩宿誓弘普難量
其慧無邊不可窮極猶若天金而無點汙所
以然者用無瑕穢消盪塵蓋永無貪欲其諸
惡心不能復亂又其意猛不爲惡屈守護邪
念亦不使生瞋恚愚癡所有貪著汲汲五欲
貢高自大諸所不可皆悉除盡三住菩薩常
護是心曉了內法而不可見亦無形相假使
有相則毀法性捐捨重擔及諸垢濁當建是
心不令懈怠尋其心識悉無處所而不可見

無若干想有憤亂者護使定意無智慧者育
養成辨計於一切受形之分有功德者無功
德者悉欲度脫至于大乘思念大乘亦不有
跡訓誨一切履行法者畢志堅固淨於三地
成於道果諸在厄難皆令建立無極功德雖
獲其報知無所有心亦如是求不可見所以
然者用慧觀知無去來今如是最勝菩薩常
學修乎大慈若有苦難自投歸命欲求救濟
全身命者寧喪軀體願受苦惱先度前急不
負要誓其行慈者平等如秤若有增益不以
喜悅設毀謗者不懷憂感是為菩薩十六隨時行
慈夫行慈者常以三事淨身口意終不傳惡
亦不念邪雖在愚癡塵勞之間獨步無畏亦
不自大所學之法不捨普智諸神通慧攬諸
佛法隨人所求不逆其心爾時世尊復告最

勝昔我遊學淨三住結功齊德整共同聞者
不可稱計其中退轉在吾後者不可陳說吾
從一住至于三住建立弘誓心不移轉於其
中間所作功德亦不可量具捨珍寶奇異妙
物國財妻子不在其例但念頭施與其前人
九千九百九十九頭最後遇虎飢羸窮急伺
捕羣獸竟不剋獲便欲噉子以全其命舒身
張爪前欲搏撮吾與慈氏柔順為伴顧謂二
人今正是時誰能建心勇猛特出以身自投
施彼餓獸二人各自還相視面口雖不言心
懷退轉吾尋觀知彼有悔意即於山頂投于
深谷首陀會天尋下接持即化甘露狀似吾
身飼彼餓虎使得滿足母子俱全吾亦不損
思計彼身乃充萬頭是故最勝進學菩薩修
成三地亦有悔還心不堅固正使我身入虎

口者虎亦不食亦不親近所以然者由其立
根得神力故於一切法而得自在當習悔過
未曾藏匿用無量施勸助功德菩薩修學頒
宣道義奉習勤學大士之法其意牢固不捨
弘誓無極德鎧用自纏絡佛復告最勝進學
菩薩修治三地常當專心無令變異不以所
見為動衆心於諸煩勞恒知遠離於已止足
無有僥倖不於想著心不流馳不求榮冀尊
豪高位令一切人如法習法宣開上智使同
其原彼我為一然無差別隨其因緣而示現
之當不以生非不有生無生不生乃淨其地
以為不惑終不以惑或出塵勞乃謂為惑惑
不見惑無惑不惑深知眩惑乃應真空如是最
勝菩薩之行分別空無引致入法具在苦
痛皆令普安是謂最勝進學菩薩於三住地

而淨其行
色入品第四

是時最勝菩薩前白佛言何謂生貴菩薩於
四地中而淨其行佛告最勝生貴菩薩於四
地中常當不捨奉真人法念在閑靜不離宴
坐於婬怒癡恒以少欲意趣知足亦不貪著
不捨苦行十二法要執持禁戒如防蛇虺見
欲穢惡如被火然除愛欲意亦不使生興意
視衆如泥洹想惠施所有不惜身命不懷慢
情於衆貢高不慕所有亦無三礙修行閑志
心識之法於大衆中念行法施訓誨衆生果
其所願積功累德為無上道習在閑居山巖
獨處所有多少趣足而已行諸德業而無厭
足博學多知詔受不倦所演智慧不以為勞
校計身中思惟本末智慧通達所念具足離

於衆惡修解脫門其解脫者是菩薩教了諸六
法本思惟微妙當別五陰成敗之相觀知四
大地水火風觀見六衰所起根本十二因緣
深無邊際生死變易不可窮盡苦言忠諫念
持不忘不計我人壽命長短寂寞無爲行非
常業解知一切虛而不實復次最勝四住菩
薩當護佛土分別道俗悉不可見菩薩之行
智不可窮辨一切德修治國土隨其次第成
就處所慧海無邊所受無厭多所救度一切
衆生其所修行常爲先首最尊最上無能及
逮所念總持強記不忘各獲善本令不缺漏
所以然者用尊貴法得遠緣縛因斯受決入
正士室亦因專勤意不退轉自致具足無上
聖業所願輒成亦不見成若見成者則爲非
成其所修行永無所見行其定意攝攬諸法

所爲之行無令有短制伏心意是其道業修
行自守無若干想所以者何乃離諸惡不與
從事專精行施良祐福田菩薩發心於一切
衆生不以身心有所貪愛轉增上妙無極之
哀專精奉戒如護雙目教犯戒者使不爲惡
亦當專精修行忍辱夫行忍者亦爲甚難雖一
在尊位財富極樂不輕貧賤羸瘦之人如是
最勝忍辱爲難勤加精進亦不可及坐佛樹
下正身正意結加趺坐亦不動轉若有人來
言避吾處我欲坐此當建牢固勿爲彼伏先
取佛道具諸相好降伏魔已即捨與處是謂
精進爲難得及專心定意亦復難及生貴菩
薩入定意時天雷霹靂萬響俱震欲得動亂
菩薩心者不能轉亂如毛髮許是謂最勝菩
薩定意故曰難也菩薩以慧修諸功德不以

為勞於諸衆生出入行步和雅安詳威儀備
悉法服齊整是謂菩薩修其智慧功德堅強
無能危者曉知本無鉤玄致遠博覽微妙其
明極照無所不達專精其心無有流馳常念
一切無所依者為設方便令得其依有闇冥
者使觀大明無所歸者為受其歸處卑賤中
與作善友行姦偽者教修質朴見強梁者為
示忍辱於飾好中不為綺雅見無反復教使
報恩處在天宮令行十善在懈退處修奉業
德設見貢高不懷自大有求其便不能得短
不思念惡不說缺漏若在邪業輒往將護使
入安詳衆生之類來到其所歡喜承受無瞋
恚心有諫喻者示進退法此當應爾此不應
爾可然不然心無增減篤信罪福知有報對
設在城郭遊近人間如在曠野巖居不異不

貪利業不惜身命心懷清淨無是非意常護
口過言無彼此不求供養望其恭敬明知節
限止足而已心常柔和不由弊惡度於生死
息諸患苦由是永致成大乘迹菩薩慧心亦
不可見生死往返亦無所有以權方便明了
訓誨隨時適化於一斷於終始終始無來亦無去
者解知悉空而無處所菩薩計有便為著有
於布施中亦計無有亦無所有復不可見所
以者何六度無極復不可見亦無所有如是
最勝菩薩布施悉無科限有科限者則非真
施設當選擇當施與是不應施是分別高下
意生是非施不周普不應為施若能惠施不
生染著無種種念乃謂為施受施之主得全
其命便能安隱坐起誦習身體得定氣力強
盛周旋生死常不渴乏所生之處神足飛行

在所到方爲人所敬得神通眼見十方國耳
聽遠聞無極音聲遠致妙香戒定慧解度知
見身爲彼種種德勲之香身體香潔莫不悅
豫常得餽饌甘美之味宿福所植而致奇相
清淨無垢爲人所護隨其所乏而施與之身
常無病不生不死無有衆患恒獲安隱一切
具足備悉成就三十有二人之相得八十
種衆好之容敷開法藏不生貪恪充備道慧
無所匱乏有來求索而不愛惜輒能盡施逮
一切智諸通誨一聖慧廣濟無窮得深經典樂法
之樂於佛樹下坐于道場降伏魔兵及諸官
屬不以色故有所施爲知色爲空色亦自空
色不自知乃知色空如是最勝菩薩解知色
性空者便爲一切道法之首成就法眼爲一
切導三世特尊獨步無侶斯由具足諸通慧

故佛復告最勝生貴菩薩終不信邪顛倒之
法若見衆生各有所奉祠祀求福心不動轉
以食向口見有生類正立無上獨尊之行終
不動轉捨就小道知是深法無與等者勤心
進業亦無他想雖有他法雜異之儀常以法
性觀了別知雖共周旋意終不轉就於他道
正使遭世有佛出世及般泥洹遺法教授復
遇滅盡聖衆遊化又值中斷心常一定亦不
變改雖無三寶不隨邪念恒習深妙無量經
文用十二部遍見一切善權方便無所不入
不貪名譽現身變化不自稱譽如是最勝生
貴菩薩執行正見知空不真無正不正正無
所有明解此者是謂正道復次最勝菩薩大
士修習智慧分別有無曉知真空亦無所著
復當修行諸慧句義亦無所有苦諦滅苦習

結已斷盡斷愛習道果受證等智照察息淫
怒癡法智除垢達上中下以遠忍智上觀二
界知他心智普了衆生心中所念無生智者
不受生死胎分之穢行滅盡智曉斷五陰生
滅端緒思惟三根所應行本未知已知無知
之根至意成道當學斯根從三白衣至須陀
洹修未知根從斯陀舍至阿那含學已知根
從阿羅漢至成作佛學無知根復當習定觀
了禪智初禪總攝有覺有觀次禪中間無覺
有觀復從二禪至無想定無覺無觀其心寂
滅亦無動搖常念篤信入於正定如是最勝
菩薩晝夜不作是念吾知奉戒真人之處亦
知無戒行惡之人無有異心分別之意悉知
虛寂無有一二前後中間亂念之想菩薩精
勤念不離佛法及聖衆戒施天念安般休息

身苦死念亦知無處思除五結敬六重法行
四神足育養大衆端正心意奮振無畏設有
沙門外道異學或天梵魔及餘衆輩亦無有
難詰問之者不見若干起吾我想以是之證
行常安隱亦無所畏得精進力立第一處在
諸大衆而師子吼轉大法輪沙門淨志梵釋
魔衆一切外道所不能轉唯佛能轉如來身
者金剛所成諸漏已盡而無塵埃正使恒沙
億姪衆生無敢言佛諸漏未盡如來所說言
真無二善惡之報不失本願一切餘衆離內
法者不見敢能違佛言教所說賢聖至道之
要行是得道犯惡入罪亦無有能非如來教
亦不見教有所出處無教不教教無所有深
知教戒是謂真道如是最勝生貴菩薩求成
佛道行無缺漏欲聽法者捨諸不要先說微

妙使獲所起悉遍志願各得具足若有所說不恐怖處心未曾變無有狐疑不別好醜與二見心亦不思惟善惡差別所行法性亦無希望菩薩不念受其功報普爲一切有形之類不習聲聞緣覺之心亦不生念有所成辦令一切衆不離佛藏知一切空佛法亦空以因緣想有所興發由斯觀察而不可見亦無形質言有形者則毀法相相亦無相相不自生生無根芽何由有相相一無形而不可見是謂正真無上之道如是最勝生貴菩薩於四住地淨修其行不離諸佛神通之慧有所施爲應適前人所說輒成無有不應從佛法教不捨本誓其心堅強完具甚安所可施爲皆達無願爲諸願者作善因緣其在三界無能逮者願令其德周遍一切菩薩之業其志

常定一切智心無所不入以是之故名曰空寂所作施與過諸想著降伏衆魔令不自在如是最勝生貴菩薩常念修四無所礙慧於真諦法亦無所礙於聖要義慧無所礙於辯才智慧無所礙所說明達慧無所礙是謂菩薩行無礙智與衆超異決斷心疑得至無爲及無央數不可稱計衆生之類普使濟度永處安寧除計常想思惟無常便斷欲愛形無形愛無明憍慢消盡不生先除身愛無今生想此五陰身漏結不淨眼如水泡亦不牢固幻僞不真惑世愚士染著不倦眼耳鼻口身意之法斯亦無常而不可見無形無主永無名號當熟觀色色非我有亦非我造乃從無有而生此有以有形色便有識神以有識神便生五陰已生五陰便染六情以染六情乃

有癡行至者病死憂苦萬端往來周旋宛轉
 三界流趣五道無有窮已斯由合會因緣所
 成因是有是無是則無此起則起此滅則滅
 眼耳鼻口身意之法亦復如是皆悉虛寂而
 無形質智者達了本末皆空何用疲勞困苦
 識神如是最勝生貴菩薩去離色想心不染
 汙解知本末而無所有亦不見成復不見敗
 諸法之本寂寞空無無能動轉超越其上况
 復過者此則不然學一切智廣布其義悉了
 諸法空而不真是故最勝當勤習學學無所
 學當作是行行無所行生貴菩薩於四住中
 而淨其地

十住斷結經卷第一

音釋

榛奴太切 濡首濡音 捷沓捷阻立切 愆梵語也亦云乾
 合捷巨言切 捷捷阻立切 戢阻立切 媛古哀切 黠胡八切
 刈魚肺切 僥堅亮切 獷古猛切 搏博音
 盪徒朗切 憤古對切 噉徒敢切 搏博音
 也撮于括 飼音寺 眩黃縮切 斲古顏切 詰吉
 切瓜取也 餉音寺 眩黃縮切 斲古顏切 詰吉
 讓切責也